

19 marsa - Fankalazana an'i MD JOSEFA



Ry Kristianina havana, manana ny akony manokana ity fankalazana an'i Md Josefa amin'ity taona ity satria ao anatin'ny Taona masina natokan'i Papa ho fiombonana manokana amin'i Md Josefa Mpiaro ny Eglizy Erantany izany hoe Mpiaro an'izao tontolo izao. Ny antony dia tamin'ny 8 desambra 1870 raha nanambara ho foto-pinoana (dogma) I Masina Maria notorontoroina tsy azon-keloka dia nambaran'i Papa Pie faha-9 ho Ray Mpiahy sy Mpiaro ny Eglizy Eran-tany I Md Josefa. Feno 150 taona io fanambarana io. Mankalaza ny Jobilin'izany isika ka nanoratra taratasy fanentanana mikasika an'izay fankalazana izay I Papa François "Patris Corde" izany hoe FON-DRAY. Ny lohateny dia manambara ny tanjona tian'i Papa ho trararina ary tiany ho tsapantsika. Marary izao tontolo izao noho ity krizy ity, noho ity KORONTANAVIRUS ity. Tsy krizy ara-pahasalamana fotsiny no atrehintsika izao, hoy ny Papa, fa krizy marolafy ary tena "FANDRAVANA" mihitsy ka ny fianakaviana no tena mitondra faisana. Izany ihany koa no mahatonga azy miantso taonan'ny fianakaviana ho fankalazana ny faha-5 taonan'ny fampirishiana apostolika "hafalian'ny fitiavana". Nanao hiaka, manao antso avo ny Papa Frantsoa ao amin'ny taratasiny "Fon-dray" fa MILA BABA, MILA RAY, MILA RAY AMAN-DRENY izao andro sarotra izao raha tiantsika ho tafavoaka isika. I Md Josefa àry no nomeny ho MODELY SY MPIVAVAKA ho antsika amin'izao taon-jobily hahatsiarovana sy hankalazana azy ho Mpiaro sy Mpiahy ny Eglizy eran-tany izao. Andeha hiaraka hibanjina an'i Md Josefa isika fa indrindra vanimpotoan'ny karemy rahateo izao.

Niara-nanomboka ny vaninandron'ny karemy isika tamin'ny voalohan'ny volana marsa izay volana natokana ho an'i Md Josefa. Karemy izay ADY sady DIA mankany amin'ny Paka.

ADY amin'ny ratsy izay mandrendrika antsika ary DIA tsy mora fa sarotra ihany koa mankany amin'ny Paka, fandalovana hidirantsika amin'ny tena fiainana, fiainan'ny zanak'Andriamanitra, ka i Jesoa nitsangan-ko velona no famantarana ho antsika sy hivelomantsika an'izany fiainana maha-zanak'Andriamanitra izany. Raha miara-maty amin'i Kristy amin'ny fahotana isika dia hiara-hitsangana Aminy koa amin'ny Paka.

Amin'ity volana marsa famakivakiana ny karemy ity dia noraisintsika i Md Josefa ho modely sy mpivavaka hivelomana an'izany ADY SY DIA izany satria azo lazaina fa i Md Josefa dia niatrika an'izany tamin'ny tantaram-pamonjena amin'ny misterin'ny fahatongavana ho nofo. Ny prefasy androany dia milaza an'i Md Josefa ho lehilahy marina sy tia vavaka. Ireo toetra fototra hita ao amin'i Md Josefa no noraisin'i Papa ao amin'ny taratasiny ankoatr'ireo toetra hafa nasongadiny toy ny lehilahy tia fahanginana, tsy be resaka, ray tia ny fianakaviany ka nahafoy tena ho an'ny fianakaviany, ray niasa namelona sy nanabe ny fianakaviany sns... Tsy afaka hiditra amin'ny antsipiriany isika eto ka noho izany manasa antsika hamaky io hafatr'i Papa io izay tsy lava fa feno sy mafonja kosa.

Haka toetra vitsivitsy amin'izao fankalazana izao isika ho banjinintsika sy hianarantsika amin'izao famakivakiana ny karemy izao.

Tsy inona izany fa ny fiezahana hivelona ny marina ao anatin'ny fiainana feno fivavahana. Ny sekoly katolika eto Madagasikara dia efa nandray ny lohahevitra manokana: Ny *manao ny marina no hendry ary ny marina no maha-olona afaka antsika*. Araky ny tarigetran'ny sekoly katolika io, tsy hoe ny olomanga no tsy misy eto amin'ny Nosintsika, na ny manam-pahaizana na ny manan-karena na ny mpanao politika no tsy misy eto amintsika. Manana ireo isika ary maro isan-karazany aza ka mahavelo-pisaorana an'Andriamanitra izany saingy indrisy mipetraka ny fanontaniana : *maninona isika no mbola tsy afaka mandroso,maninona isika no mbola anaty adim-piainana isan-karazany, mbola ao anatin'ny fahoriana, maninona isika no tsy afaka miala amin'izany fahoriana izan, ary indrisy ampian'izao krizy izao dia tena latsaka ambany dia ambany araky ny re dia manaraka ny Nosy Comore ?* Samy mahatsapa ny rehetra fa ny fahamarinana no tsy ampy eto Madagasikara, ny tsy fahamarinana no aretina mikiky an'i Madagasikara. Raha ny marina kokoa mahantra olona mivelona an'izay Fahamarinana izay, izany hoe MAHANTRA OLO MARINA I MADAGASIKARA. Koa raha te-handroso isika satria misy an'ireo olomanga, olona manam-pahaizana, olona manan-karena ireo dia velomy ao amintsika izany fahamarinana izany dia hanana olon-kendry isika. Olon-kendry tokoa no tsy ampy eto amin'ny firenentsika. Raha tadidintsika tsara tsy vola aman-karena no nangatahin'i Salomona tamin'Andriamanitra fa FAHENDRENA ka araka io lohahevitra nomena ny mpianatra katolika io dia IZAY MANAO NY MARINA NO HENDRY... Raha azontsika dia mila volena io toetra io, io fitondran-tena io ka izany indrindra no anoloran'i Papa antsika an'i Md Josefa ho modely sy Mpivavaka. Mafy ny nanjo an'i Josefa. Tratry ny fakam-panahy izy. Impiry isika tratry ny fakam-panahy ary izay no mahatonga antsika milaza hoe "hanao lainga masina". Tsy misy izany "lainga masina" izany. Ratsy avokoa

ny lainga sy ny fitapitaka ary ny risoriso. Ary tsy misy lehibe na kely fa ratsy jiaby... Izany no mahatonga antsika milaza fa mitaky safidy ny fiainana ary io safidy vokatry fiovam-penitra mahery vaika io no miteraka ADY SADY DIA amin'izao fiatrehantsika izao KORONTANAVIRUS izao, fiatrehantsika izao krizy maro lafy izao araky ny voalazan'I Papa ary indrindra izao vanim-potoan'ny karemy izao. Raisintsika àry i Md Josefa ho modely satria NISAFIDY izy hanao ny sitrapon'Andriamanitra na dia mafy sy tsy fantany aza ny mety ho vokatr'izany satria OLOM-PINOANA izy ary OLOM-PANANTENANA tahaka an'I Abrahama razambeny. Aoka ho modely ho antsika I Md Josefa fa indrindra isika RAY, BABA, RAIAMANDRENY. Mila izany ny firenena, ny fianakaviana, ny communauté, ny eglizy, ny fiaraha-monina sns....

Fantantsika fa nisedra zavatra maro i Md Josefa kanefa nitoetra tao anatin'ny fahamarinana ary izay no fa anton'ny nifidianan'Andriamanitra azy ka niantsoan'Andriamanitra azy ho ray mpitaiza an'i Jesoa. I Md Josefa no nikolokolo ny zanak'Andriamanitra, izy no nanome ny anaran'ny zanak'Andriamanitra, nataony hoe Jesoa no anarany tahaka an'i Zakaria rehefa nanontaniana hoe : *iza no anarana omena ny zanakao ?* dia nomeny ny anarana hoe Joany, toy izay koa ny maha Ray an'i Josefa dia mba nanome anarana koa izy.

Izany no hafatra ho antsika, aoka isika ho Ray aman-dREny hanome anarana mendrika ny zanatsika mba hivelomany an'izany anarana izany ka hahatonga azy ho olo-mendrika. Tsy ny anarana no tiana ambara eto, fa matoa i Josefa nanome anarana hoe Jesoa dia satria fantany ny làlana tsy maintsy hizeran'i Jesoa ka aoka izany ho fampianarana ho antsika amin'ireo zanatsika izay taizaintsika sy beazintsika, tezao ao anaty fahamarinana sy ao anatin'ny fitiavam-bavaka izy dia ho lasa olom-banona.

Nikarakara an'io fianakaviana masina io I Josefa ary fantantsika fa ny Eglizy dia nanome hasina manokana azy ary izany no ankalazaintsika azy ho Ray mpitaiza sy mpamelona ny zanak'Andriamanitra. Mpandrafitra izy ka namelona ny fianakaviana masina tamin'ny alalan'ny asa. Fampianarana velona ho antsika koa izany amin'izao ADY SY DIA amin'ny karemy izao. Ny asa no anisan'ny maha-olona antsika ka aoka isika hanatanteraka tsara ny asa tandrify antsika. Aza variana amin'ireny rendrarendra isan-karazany ireny isika, misy aza ny olona amin'ny ora fiasana dia lany fotoana amin'ny zavatra hafa, variana—amin'ny fihinanana katy ka tsy tanteraka araka ny tokony ho izy ny asa. Aoka àry isika hiady amin'ny hakamoana, amin'ny zava-mahadomelina izay manapotika ny asa izay tsy mendrika ny maha zanak'Andriamanitra antsika.

Mpiaro ny zanak'Andriamanitra i Josefa, feno ahiahy izy hatramin'ny voalohany, *inona ny hatao fa ho afa-baraka I Maria izay tiako hampakarina*, tsy nitady hanameloka an'I Maria izy fa nitady hametraka azy mangingina na dia efa fofombadiny aza.

Torak'izany koa tamin'ny fotoanan'i Heroda, nandeha tany Ejipta izy mba hitondra ny zaza tsy ho voavonon' I Heroda. Koa mahaiza koa isika mahay mandray ireo mitsoa-ponenana sy ireo vahiny fa hanampy antsika ihany koa izany tahaka ny nataon'i Md Josefa.

Mila fahasahiana izao androntsika izao hivelomana ny safidy efa nataontsika ary izany no ahafahantsika mijoro ho tena vavalombelona. Modely ho antsika I Md Josefa na dia tsy be teny aza.

Mahavariana io toetra anakiray io ka tsara asongadina. Matetika amin'izao andro izao be resaka isika ka manimba zavatra maro. Tsy mahatma-bava ka mitakoritsika etsy sy eroa. Fantsika fa mandrava zavatra maro izany. Anisan'izany ny telefonina. Ilaina nefa tena manapotika satria tsy misy limite intsony. Hendry Md Josefa ka tsy be teny. Izay mangina volamena, hoy ny razana. Modely ho antsika I Md Josefa eto. Samia mandinika isika satria isika ihany no mety potika vokatry ny tsy fahaizantsika mangina.

Olona tia vavaka koa i Md Josefa, nokolokoloiny ary nampianarany tao anatin'ny fivavahana ny Fianakaviana masina. Nandeha matetika tany Jerosalema nanao fivahiniana masina izy ireo, tany aza i Jesoa no tafajanona niresaka tamin'ireo mpahay lalàna ka nanaovany hoe *“Ato amiko ny fanahin'ny Tompo, hirahina aho hitory vaovao mahafaly”*. Izany rehetra izany dia vokatry ny fanabeazana nataon'i Josefa an'ny fianakaviana masina.

Aoka isika amin'izao karemy izao hanabe ny zanantsika ao anatin'ny fivavahana, fa ao no hanovozana ny fanahin'Andriamanitra. Hikolokolo sy hanabe azy ireo ao anatin'ny tena fahendrena sy fahamarinana ary fitiavam-bavaka. Fantantsika koa fa noho izay maha-Ray mpitaiza an'i Josefa izay ary amin'ny maha-mpandrafitra azy dia nanome hasina ny asa izy ka izay no mahatonga azy ho mpiaro ny mpiasa rehetra.

Misaotra Anao izahay ry Jesoa noho nifidiananao an'i Md Josefa ho Ray mpitaiza Anao ka amin'izao fotoana ankalazana manokana an'i Md Josefa izao dia mivavaka ho an'ny Raim-pianakaviana rehetra izahay mba haka tahaka an'i Md Josefa, ho modely tokoa ary hivavaka ihany koa ho anay tsirairay mba ho olomarina sy tia vavaka.

Mahatsiaro manokana an'ireo mpitondra fanjakana izahay satria iray ihany koa ny mpitondra, ny Ray aman-dreny ka enga anie hanana ny toe-panahin'i Md Josefa izy ireo ho olona marina, ho eo anivon'izy ireo anie ny vavaka sy ny fitiavana ary fahatahorana an'Andriamanitra.

Md Josefa, ampio izahay amin'izao ADY SADY DIA mitondra anay amin'ny Paka izao ka ny vavakao anie, Md Josefa, hanova ny fonay. Ho fo vaovao anie no entinay mankalaza ny Paka ka hiaraka hitsangana amin'i Kristy tokoa izahay dia ho EOY MISIONERA TABERNAKLA VELONA HANORINA ETA, handresy ny KORONTANAVIRUS. Enga anie Ianao ry Jesoa ho ivon'ny fiainanay ka hahay hampitraotra ny finoana sy ny fiainana andavanandro tahaka an'i Md Josefa izahay, io no lalana hitondra anay any amin'ny fiadanana marina. Amen

Mompera Arseveka Mgr Benjamin Ramaroson